

Date – 24/10/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Thla thar ni 11 a Dampa bial by election lo awm tur a chuh turte hming pe lutte zingah inhnuk dawk an awmlo.
2. Kolasib-a Lirtheia eizawng pawl hrang hrang Joint Action Committee chuan State Highway tha nei turin an nawr zui zel dawn an ti.
3. Mizoram Truck Owners Association Aizawl- Silchar National Highway lirthei zawh hleih theih loh khawpa chhia chu vawiin khan an enho ve leh.
4. Prime Minister Narendra Modia chuan vawiin khan Rozgar Mela-ah sawrkar hna hmu thar mi sing 5 leh sang 1 te hnenah appointment letter a hlan.

<><><>

DAMPA SCRUTINY

Thla thar ni 11 a Dampa bial by election lo awm tur a chuh turte hming pe lutte zingah inhnuk dawk an awmlo.

Election Commission of India in Dampa MLA bial By Election chuh tura hming pe lut te tan Returning Officer hnenah inhnuh dawhna hun vawiin tlai dar 3 theng hawn a ni a, hemi chhung hian inhnuk dawk an awmlo a ni.

Puan tawh thin angin Dampa bial by election chuh tur hian National party 2 - BJP leh INC, State party 2 -MNF leh ZPM, leh Unrecognised register party 1 (MPC) ten hming an pe lut a ni.

Dampa bial ah hian Polling station 41 awmin vote nei 20790 hmeichhia 10185, Mipa 10605 leh Service voter 115 an awm a ni.



MNF ACCUSED CM & ADVISER TO CM

Dampa Bial by-election neih turah Chief Minister Pu Lalduhoma leh a adviser Dr Lorrain Lalpekliana Chinzah ten inthlan model code of conduct an bawhchhia ni a sawiin vawiin khan MNF Legal Board in Joint CEO hnenah complain an thehlut.

Akashvani Aizawl zawhna chhangin, MNF Legal Board secretary David R Lalsawmtluanga chuan Dampa Bial by-election lo awm tur atana election model code of conduct in a phuar tawh hnuah Reieka campaign kick off ah Chief Minister Pu Lalduhoma chuan aieng herna khawl pek leh cheng vbc 700 man tui lakna te a tiam a, Chief Minister adviser Dr Lorrain Lalpekliana Chinzah chuan Dampa bialah free clinic a buatsaih bawk a, a Facebook wall ah amah ngeiin a tarlang tih a sawi.

Inthlanna fel leh thianghlim a awm theih nan vawiin khan Mizoram Joint Chief Electoral Officer, Pi Ethel Rothangpuii, hnenah complain an thehlut a, a tul ang angin hma an lo la dawn a ni a ti.

Byte: MNF Legal Board secretary David Lalsawmtluanga



KOLASIB PRESS MEET

Kolasib-a Lirtheia eizawng pawl hrang hrang Joint Action Committee chuan Mizoram sorkarin petrol leh diesel man a kawng siam na tur chhiah an lak chu State Highway chauh a hman a nih tur thu PWD Minister in a lo hrilh tawh a, hei hi an chhawr ve loh avangin a man hmasa anga petrol leh diesel man ti hniam turin thuneitute hnenah an lo thlen tawh tih an sawi.

Vawiin khan Kolasib Dist Hqr Mizoram Tipper Association, Joint Action Committee leh Cachar Drivers Union hruaitute chuan Kolasib Press Club ah Chanchinbumite an kawm a, JAC Vice Chairman Pu H. Lalchhanchhuaha chuan National Highway Kawngpui te a that theihna tura an hmalakna kal mek chu tih tawp rih a nih thu a sawi a, tun tuma Road Block an huaihawt chu an tawpna tur a nih loh thu leh sorkar lam hotute leh NHIDCL ten Kawngpui siam hun tur an tiam ang te JAC-in a en zui reng dawn a ti. Thla thar November a Kolasib District chhunga Kawngpui pawimawh hrang hrang Bairabi to Kolasib, Vairengte to Kolasib leh Serkhan to Bagha Road te an siam dan an vil reng dawn tih sawiin, an duh khawp a thleng lo a nih chuan theihtawp in hma an lak zui tur thu a sawi a ni.

Pu H. Lalchhanchhuaha chuan Kawngpui tha neih duh avanga ni 23 ningani a Road block an neih ah an thawhpui mi 25 lai Police-in man in, lock-up ah dah an nih thu a sawi a. Road Block an tih tawp chhan pawh an thawhpui ten lock up hial na luh avang leh heng an mi leh sa an man te hi case rit tak leh bail theih loh sorkar in awrh tir an tum vang a ni a ti.

Pu H. Lalchhanchhuaha chuan Cachar District Drivers Union pawh in Mizoram kawng chhia an vei em em ani, a ti a. Nimin piah mai ah Gauhati lam Driver pakhat chu kawng chhia avanga harsatna thleng vangin nunna hlu tak a chan a, hetiang harsatna hi lirthei khalh tuten an tuar mek a ni, a ti. Construction Company ten kawng siam tur hian working season-ah pawh thawh tum lovin chhuanlam an lo siam tawh thin tih sawiin, an siam dawn ti reng chung siin, an siam mumal ngai lo a, hei hi mi an ngaihneppang vang niin a lang, a ti a ni.

Cachar Drivers Union hruaitute pawh in thu sawi in, MTA leh JAC ten Kawng tha duh vanga Road Block an neih chu an thlawp tih an sawi a, nimin thleng khan Assam lam atanga Mizoram pan tur lirthei lian te pawh an la din tir tih an sawi. Kawng chhia avangin lirthei tlan dan turah Mizo driver te nen an in ti buai a, kut pawh an inthlak, mahse, an in ngaidam leh thin a. Chutiang ni lo a, anmahni venghim tu tur Police lamin Kawng chhia vanga lirthei an din buai karah hnamdang driver te an hlap vak zel chu tawp tawh se, an ti.

Cachar Drivers Union hruaitute chuan Vairengte Police checkgate-a an chawi tur pawisa an chawi hnuah Trade and Commerce checkgate leh Taxation checkgate-a pawisa tam tak an chawi tir leh thin tih he hunah hian an sawi bawk a, hei hi tih tawp dan awm se an duh tih an sawi a. Hei bakah hian Police uniform ha zurui ten pawisa an dil nasa thin hle niin an sawi bawk.



MTOA

Mizoram chak lakluhna kawngpui Aizawl- Silchar National Highway lirthei zawh hleih theih loh khawpa chhia chu vawiin khan Mizoram Truck Owners Association MTOA chuan an enho ve leh a.

Khamrang leh Kawnpui inkar kawng te zawh chhuakin, an pawl President Pu B Lalzarzova chuan Zoram mipui chak lakluhna ber heti tak maia a chhia hi hriatthiam har an ti a ti a, kawng siamtu tur chu NHIDCL a ni emaw, sorkar a ni emaw, an harsatna tawh chu sutkian tul an ti a ni.

Pu Lalzarzova chuan National Highway a chhiat avanga an tawrhna te sawiin, an motor a chhiat phah bakah an inhnuhchhuah tumna lamah hnamdang mi pawhin nunna a chan phah hial tawh a ti a, ruahtui a han tan a, engtiangin nge hmalak chhoh a ni tih hi an ngaihven a ni a ti.

Mizoram Truck Owners Association President Pu B Lalzarzova chuan Kawnpui Police station thleng kawng siam an endik tih a, chumi a zir chuan an hmalak zel dan tur an sawiho leh dawn a ti.



GST REFORMS

Kumin September ni 22 atanga GST 2.0 a taka hman a nih hnuah Mizoramah lirthei lei tum an pung nia an hriat thu lirthei zuartuten an sawi.

Aksahvani Aizawl zawhna chhangin, G.I.G Motors Finance Manager James Lalbiakzama chuan GST siamthatna chuan lirthei lei tum a ti pung a an hriat thu a sawi a, hetihual hian sakhaw hrang hrang kutpui hunlai (festive season) a nih avangin kumtin tun ang hun hi lirthei an hralh chhuah hnem hun lai a ni a, hei vang hian GST 2.0 hman a nih hnuah eng ang takin nge lirthei hralh chhuah zat leh book zat a pun tih a hriat theih rih lova, nakkum February chho velah a hriat theih chauh a rin thu a sawi.

Byte: Finance Manager James Lalbiakzama

G.I.G Motors chhinchhiah danin, GST 2.0 a taka hman tan ni, September ni 22 atanga October ni 23 thleng lirthei 257 an hralh chhuak tawh a, September ni 22 atanga 30 chhung khan lirthei 137 hralh chhuakin, October ni 1 atanga nimin ni 23 thleng khan lirthei 220 an hralh chhuak tawh bawh a ni.

Lungleiah chuan GST dan thar hi dawrkai engemawzat in an zawm a, a hlawhtlin nan State Tax, Lunglei Zone pawhin theihtawp an chhuah a, amaherawhchu dawrkai thenkhat ten GST an ti duh tlat lo chu buaina liantak pakhat a ni tih kan corr an hrilh a ni.

Asst. Deputy Commissioner of Taxes, Lunglei Zone Pu Lalzarliana chuan he GST hniam hi mipui vantlangin a hlawkna an tel tur a ni a, Tax pek ngai a lo awm anih pawhin mipui zawk khan an pek tur a ni. Mahse dawrkai te hian anmahni chawi tur emaw an ti a, chuvang chuan GST Registration an ti duhlo a ni a ti. Dawrlian Wholesaler GST inziaklut lo te chu hriattirna pek an ni tawh a, tax invoice pawimawhzia pawh hrilhhriat an ni tawh a ti a, thuawih duhlo zingah dawr lian tak tak 5 chu pawisa chawi tir an ni tawh a ti.

Hetihruai vek hian Ei phung thenkhatah chuan Wholesale atangin thil man a hniam a, MIZOFED dawr te pawhin Hawkins Product-ah chuan an Pressure Cooker man an tihhniam thu an sawi. Damdawi lamah pawh a man tlahniam engemawzah a awm a, Gilead Drugs Store Lunglei chuan Item tamtakah aman a tlahniam tih hetiang hian an sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM ROZGAR MELA

Prime Minister Narendra Modia chuan vawiin khan Rozgar Mela-ah sawrkar hna hmu thar mi sing 5 leh sang 1 te hnenah appointment letter a hlan. Thusawiin Pu Modia chuan ramchhunga hna tam tak lak chu thalaite tana beiseina pe tu ber a ni tawh a ti a. Rozgar Mela hmang hian sawrkar department leh pawl hrang hrangah thalaite hna pek an ni a ti bawk. Vawiin vek khan PM Modia hian Viksit Bharat Yojana a hawng bawk a. He hmalakna hmang hian ramchhung thalai vaibelchhe 3.5 te hna pek tum a ni



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 127-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

